

Ilinniarnertuunngorniarfiit aamma ilinniarsiit ingerlaqqiffiusut pillugit inatsisit allannguuteqarnissaniq siunnersuuteqaqqullugit Naalakkersuisut peqquneqarnissaanni Inatsisartut aalajangiiffigisassaattut siunnersuut, tamatumani qulakkeerneqaqqullugu inuussuttut ilinniarsiini aamma ilinniarsiinni ingerlaqqiffiusuni soraarummeerneri, ilinniartut kalaallisut oqaatsiminnik atuisinnaanissaat pisinnaatitaaffittut inissinneqassasoq.

(Inatsisartunut ilaasortaq Najaaraq Møller, Siumut)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerinnineq

Naalakkersuisut qujassutigaa aalajangiiffigisassatut siunnersuut Inatsisartunut ilaasortamit Najaaraq Møller, Siumumeersoq.

Naalakkersuisut siunnersuuteqartoq isumaqatigaat, inuiaqatigiinnut amerlanerusut ilinniagaqartarnerat pitsaasuusoq. Ingerlaavartumik sulissutigissavarput ilalersuinissarput siuarsaanissarpullu uagut kalaallit oqaatsitta atugaanerat, aamma ilinniartitaanermut atatillugu.

Siunnersuuteqartup kissaatigaa ilanngullugu aalajangersakkap atuuttooreersup annertusineqarnissaa, ilinniagaqartut pisinnaatitaalersikkumallugit kalaallisut misilitsittarnissamut, qaffasinnerusunik ilinniartitaanerni aamma ilinniarnertuunngorniarfinni. Naalakkersuisut kissaatigaat ataatsimut isigisumi ilinniartitaanitsinni aallunneqassasoq oqaatitsigut piginnaatitaaneq, inatsisiliornitsinni aamma ilinniarsiinni ataasiakkaani namminerni.

Naalakkersuisut akueraat, siunnersuuteqartutulli inatsisitigut allannguinerit pisariaqarfiisigut ulluinnarni ilinniartitaanermik ingerlatsivinnut aamma kinguneqartarnerat, fagitigut nammineq, aammali nukinnik atuinikkut, aningaasaliisoqartarnissaatalu pisariaqarnera.

Aamma pingaaruteqarpoq ersarissunik ullormut oqaluuserisassaqartarnissarput aalajangiinissamullu piumassuseqarnissarput, immaqa uagutsinnut nammineq unammillernartunik, kisiannili anguniarumasatsinnik, ilinniagaqartullu oqaatsigut atorlugit soraarummeertarnerni atorsinnaasaannik.

Naalakkersuisut ilanngullugu qularnaarumavaat ilinniagaqartut qaffasinnerusumik ilinniarsiinniittut ilinniarnertuunngorniarfinniittullu pisinnaatitaanissaat kalaallisut oqaatitsinnik atuinissaminnut soraarummeernerminni, ilinniartitaanerillu ataatsimut tamaasa isigalugit.

Taamatut oqaaseqarlunga Naalakkersuisut inassutigissavaat siunnersuutip akuersissutigineqarnissaa.